



(„Sl. novine BPK Goražde“, broj: 4/20)

Bosna i Hercegovina
Federacija Bosne i Hercegovine
Bosansko-podrinjski kanton Goražde
MINISTARSTVO ZA BORAČKA PITANJA

P R A V I L N I K
O USLOVIMA, NAČINU I POSTUPKU
ZA UTVRĐIVANJE PRAVA PO OSNOVU PREOSTALE RADNE SPOSOBNOSTI

Goražde, februar 2020.godine

Na osnovu člana 56. i 66. Zakona o organizaciji organa uprave u Federaciji BiH („Sl. novine Federacije BiH“ broj: 35/05) i člana 42. stav 2. Zakona o dopunskim pravima branilaca i članova njihovih porodica u Bosansko-podrinjskom kantonu Goražde («Službene novine Bosansko-podrinjskog kantona Goražde» broj: 9/13, 11/14 i 15/19), Ministar za boračka pitanja Bosansko-podrinjskog kantona Goražde, uz saglasnost Vlade Bosansko-podrinjskog kantona Goražde,
d o n o s i:

P R A V I L N I K
O USLOVIMA, NAČINU I POSTUPKU
ZA UTVRĐIVANJE PRAVA PO OSNOVU PREOSTALE RADNE SPOSOBNOSTI

POGLAVLJE I-OPĆE ODREDBE

Član 1.
(Osnovne odredbe)

Ovim Pravilnikom definišu se korisnici prava, uređuje način i postupak ostvarivanja prava po osnovu preostale radne sposobnosti, podnošenje zahtjeva, obavezna dokumentacija, uslovi za ostvarivanje prava, prioriteta za ostvarivanje prava, način realizacije, finansiranje i ostvarivanje ovih prava.

Član 2.
(Korisnici prava)

Pravo po osnovu preostale radne sposobnosti mogu ostvariti lica iz člana 39. Zakona o dopunskim pravima branilaca i članova njihovih porodica (Službene novine Bosansko-podrinjskog kantona Goražde» broj: 9/13, 11/14 i 15/19) (u daljem tekstu: korisnici).

Član 3.
(Objava javnog poziva)

Ministarstvo za boračka pitanja Bosansko-podrinjskog kantona Goražde (u daljem tekstu: Ministarstvo) za svaku godinu, a nakon usvajanja Budžeta Bosansko-podrinjskog kantona Goražde (u daljem tekstu: Kanton), objavljuje javni poziv za ostvarivanje prava po osnovu preostale radne sposobnosti korisnika iz člana 2. ovog Pravilnika.

POGLAVLJE II-NAČIN, USLOVI I POSTUPAK ZA OSTVARIVANJE PRAVA PO OSNOVU PREOSTALE RADNE SPOSOBNOSTI

Član 4.
(Način podnošenja zahtjeva)

(1) Zahtjev za ostvarivanje prava po osnovu preostale radne sposobnosti korisnici iz člana 2. ovog Pravilnika, podnose gradskoj/općinskoj službi za boračko-invalidsku zaštitu sa prostora Kantona (u daljem tekstu: Prvostepeni organ), prema mjestu prebivališta/boravišta.

(2) Podneseni zahtjevi za ostvarivanje prava iz stava 1. ovog člana važe za budžetsku godinu u kojoj su podnijeti.

Član 5.

(Obavezna dokumentacija za utvrđivanje prava po osnovu preostale radne sposobnosti)

(1) Obavezna dokumentacija koja se podnosi za ostvarivanje prava po osnovu preostale radne sposobnosti:

- a) Dokaz da podnosilac zahtjeva pripada boračkoj populaciji;
- b) Dokaz da je podnosilac zahtjeva na evidenciji nezaposlenih lica kod nadležne Službe za zapošljavanje sa prostora Kantona;
- c) Dokaz o prethodnom zaposlenju za koje se traži rehabilitacija;
- d) Pismena izjava podnosioca zahtjeva da će prihvatiti zaposlenje na poslovima na kojima se osposobljava;
- e) Vrijeme za koje će podnosilac zahtjeva biti zaposlen od najmanje jedne godine dana (Ugovor ili druga garancija poslodavca);
- f) Dokaz o školskoj spremi koju ima podnosilac zahtjeva;
- g) Predugovor sa ustanovom, organizacijom, odnosno pravnim licem koje će vršiti profesionalnu rehabilitaciju uz iskazane troškove.

Član 6.

(Način i uslovi za ostvarivanje prava po osnovu preostale radne sposobnosti)

(1) Profesionalna rehabilitacija provodi se na način i pod uslovima koji su predviđeni za rehabilitaciju po propisima o penzijskom i invalidskom osiguranju ako ovim Pravilnikom nije drukčije propisano, s tim što se rehabilitacija može vršiti i redovnim školovanjem u školama srednjeg obrazovanja, ali najdalje do sticanja petog stepena stručne spreme.

(2) Ratni vojni invalidi imaju pravo na profesionalnu rehabilitaciju ako prema općem obrazovanju, godinama života, zdravstvenom stanju i drugim okolnostima imaju uslove za uspješnu rehabilitaciju i ako nisu u radnom odnosu.

(3) Ratni vojni invalidi koji nemaju stručnu spremu, osposobljavaju se za vršenje zanimanja za koje je potrebna stručna sprema stečena priučavanjem.

(4) Ratni vojni invalidi koji imaju stručnu spremu nižu od spreme kvalifikovanog radnika, odnosno od srednje stručne spreme, osposobljavaju se za vršenje zanimanja za koje je potrebna stručna sprema kvalifikovanog radnika, odnosno srednja stručna sprema.

(5) Ratni vojni invalidi koji imaju stručnu spremu kvalifikovanog radnika, odnosno srednju stručnu spremu ili stručnu spremu višu od navedene mogu se osposobljavati za sticanje stručne spreme jednake onoj koju imaju ako iz opravdanih razloga ne mogu da vrše zanimanje za koje imaju stručnu spremu.

(6) Ratni vojni invalid ima pravo na školovanje za obavljanje poslova za koje se traži viša stručna sprema od one koju ratni vojni invalid ima, ako prema općem obrazovanju, godinama života, zdravstvenom stanju i drugim okolnostima ima uslove za školovanje.

Član 7.

(Pravo na nastavak započete rehabilitacije)

(1) Ratni vojni invalid ima pravo da nastavi započetu profesionalnu rehabilitaciju, ako je do spriječenosti došlo usljed bolesti ili drugih opravdanih razloga, ukoliko spriječenost nije trajala duže od 12 (dvanaest) mjeseci.

(2) U slučaju iz prethodnog stava, trajanje profesionalne rehabilitacije može se produžiti najviše za onoliko vremena koliko je trajala spriječenost.

(3) Ratni vojni invalid koji usljed bolesti ili drugih opravdanih razloga nije završio profesionalnu rehabilitaciju na koju je upućen, može biti ponovo upućen na istu profesionalnu rehabilitaciju.

Član 8.

(Nemogućnost za ostvarivanje prava na novu profesionalnu rehabilitaciju istog stepena)

Ratni vojni invalidi koji su već rehabilitovani nemaju pravo da se putem nove profesionalne rehabilitacije osposobljavaju za vršenje zanimanja za koje je potrebna stručna sprema istog stepena za koju su se osposobili predhodnom rehabilitacijom.

Član 9.

(Postupak priznavanja prava po osnovu preostale radne sposobnosti)

(1) Po prijemu zahtjeva, prvostepeni organ dužan je isti odmah uputiti nadležnoj ljebarskoj komisiji za ocjenjivanje radne sposobnosti da izvrši ocjenu radne sposobnosti podnosioca zahtjeva.

(2) Komisija iz prethodnog stava dužna je u roku od 30 dana od dana prijema zahtjeva izvršiti ocjenu radne sposobnosti i o tome u daljem roku od 8 dana pismeno izvjestiti ratnog vojnog invalida i prvostepeni organ nadležan za boračko-invalidsku zaštitu u čijoj se službenoj evidenciji vodi vojni invalid.

Član 10.

(Prijedlog upućivanja ratnog vojnog invalida na profesionalnu rehabilitaciju)

Prvostepeni organ dužan je dostaviti Ministarstvu prijedlog o upućivanju ratnog vojnog invalida na profesionalnu rehabilitaciju najkasnije u roku od 8 dana od dana sticanja prava na profesionalnu rehabilitaciju.

Član 11.

(Zaključivanje Ugovora)

Nakon priznavanja prava i ukoliko su ispunjeni svi drugi zakonski preduslovi, Ministarstvo potpisuje ugovor sa pravnim licem za vršenje rehabilitacije i poslodavcem koji prima korisnika prava u radni odnos.

Član 12.

(Obavijest prvostepenom organu)

Ministarstvo će u roku od 8 dana od dana stupanja na profesionalnu rehabilitaciju ratnog vojnog invalida pismeno izvjestiti prvostepeni organ kojij je uputio prijedlog za profesionalnu rehabilitaciju.

POGLAVLJE III-FINANSIRANJE

Član 13. (Obezbjeđenje finansijskih sredstava)

Finansiranje prava iz ovog Pravilnika za svaku godinu obezbjeđuje se do visine sredstava odobrenih za ove namjene iz Budžeta Kantona.

POGLAVLJE IV-PRELAZNE I ZAVRŠNE ODREDBE

Član 14. (Prelazne odredbe)

Nadzor nad priznavanjem prava i odobravanjem sredstava po ovom Pravilniku vrši Ministarstvo.

Član 15. (Način izmjena i dopuna)

Izmjene i dopune ovog Pravilnika se vrše na način i po postupku koji važi za njegovo donošenje.

Član 16. (Tumačenje)

Tumačenje odredbi ovog Pravilnika daje Ministar.

Član 17. (Primjena Zakona o opštem upravnom postupku)

Odredbe Zakona o upravnom postupku („Sl. novine FBiH“ broj: 2/98 i 48/99), primjenjuju se u svim pitanjima koja nisu uređena posebnim Zakonom i ovim Pravilnikom.

Član 18. (Stupanje na snagu Pravilnika)

Ovaj Pravilnik stupa na snagu danom dobijanja saglasnosti od Vlade Bosansko-podrinjskog kantona Goražde, a naknadno će se objaviti u „Službenim novinama BPK Goražde“.

Broj: 11-11-518-2/20
Goražde, 16.03.2020.godine

MINISTAR

Edin Aganović

Na ovaj Pravilnik Vlada Bosansko-podrinjskog kantona Goražde dala je saglasnost svojom Odlukom broj: 03-11-484/20 od 12.03.2020.godine.